

A citada Lei 24/2001, do 27 de decembro, estableceu o réxime transitorio de adaptación dos plans de pensións preexistentes o 1 de xaneiro de 2002, e concedeu un prazo, que finaliza o 31 de decembro de 2004, para a adaptación das comisións de control ao previsto no referido punto 3 do artigo 7, mediante acordo colectivo, transcorrido o cal, de non se ter adoptado o dito acordo, se aplicará directamente.

Os ditos preceptos intégranse actualmente no texto refundido da Lei de regulación dos plans e fondos de pensións, aprobado polo Real decreto legislativo 1/2002, do 29 de novembro (artigo 7.3 e disposición transitoria segunda).

Cabe sinalar que o vixente regulamento de plans e fondos de pensións, aprobado polo Real decreto 304/2004, do 20 de febreiro, desenvolve no seu artigo 30 o dito artigo 7.3 do texto refundido da lei, e recolle con carácter xeral o sistema de paridade, habilitando a negociación colectiva para adoptar, mediante acordo expreso, unha composición distinta das comisións de control, mentres que, no seu artigo 32, desenvolve os requisitos para a adopción de acordos nas comisións de control.

En definitiva, o actual marco normativo exige acordos expresos de negociación colectiva para a determinación da composición, condicións de representación e maiorías para adoptar acordos nas comisións de control dos plans de emprego formalizados antes do 1 de xaneiro de 2002.

Por este real decreto lei, amplíase ata o 31 de decembro de 2005 o prazo transitorio de adaptación para as comisións de control dos plans de pensións do sistema de emprego existentes o 1 de xaneiro de 2002, establecido no antepenúltimo parágrafo da disposición transitoria segunda do texto refundido da Lei de regulación dos plans e fondos de pensións, aprobado polo Real decreto legislativo 1/2002, do 29 de novembro.

II

A extraordinaria e urxente necesidade desta medida xustifícase polo feito de que, de non estar aprobada antes do 1 de xaneiro de 2005 e na falta dun acordo de negociación colectiva, se aplicaría directamente, a partir da dita data, o criterio xeral de composición paritaria, situación que pode dar lugar ao conflito de intereses entre as partes que non puidesen impulsar a tempo os procesos de negociación colectiva para tal fin. O carácter automático do criterio xeral pode alterar o equilibrio alcanzado no seu día ao acordar o réxime de adopción de acordos, e ocasionar inseguridade xurídica a respecto das actuacións da comisión de control, con risco de bloqueo do funcionamento do órgano de control e supervisión do plan, o cal podería supor prexuízo aos intereses dos partícipes e beneficiarios.

En consecuencia, considérase de extraordinaria e urxente necesidade ampliar o prazo de adaptación das comisións de control ata o 31 de decembro de 2005, co fin de facilitar os procesos de negociación colectiva pendentes de culminar entre empresas e traballadores para a adaptación das comisións de control dos plans de pensións existentes o 1 de xaneiro de 2002, tendo en conta a necesidade de harmonizar os intereses implicados en tales procesos de negociación que afectan a determinación das condicións dos plans de pensións de emprego, e atendendo aos posibles prexuízos que a aplicación do automatismo da vixente norma puidese implicar.

Na súa virtude, en uso da autorización concedida no artigo 86 da Constitución, por proposta do vicepresidente segundo do Goberno e ministro de Eco-

nomía e Facenda e logo de deliberación do Consello de Ministros na súa reunión do día 23 de decembro de 2004,

DISPONGO:

Artigo único. *Ampliación do prazo transitorio de adaptación das comisións de control dos plans de pensións de emprego ao previsto no punto 3 do artigo 7 do texto refundido da Lei de regulación dos plans e fondos de pensións.*

Amplíase ata o 31 de decembro de 2005 o prazo establecido no antepenúltimo parágrafo da disposición transitoria segunda do texto refundido da Lei de regulación dos plans e fondos de pensións, aprobado polo Real decreto legislativo 1/2002, do 29 de novembro, para a adaptación das comisións de control dos plans de pensións do sistema de emprego existentes o 1 de xaneiro de 2002 ao previsto no punto 3 do artigo 7 do dito texto refundido.

Disposición derradeira única. *Entrada en vigor.*

Este real decreto lei entrará en vigor o mesmo día da súa publicación no «Boletín Oficial del Estado».

Dado en Madrid o 23 de decembro de 2004.

JUAN CARLOS R.

O presidente do Goberno,
JOSÉ LUIS RODRÍGUEZ ZAPATERO

21690 *REAL DECRETO LEI 11/2004, do 23 de decembro, polo que se modifica, en materia de pensións públicas, a Lei de orzamentos xerais do Estado para o ano 2005. («BOE» 312, do 28-12-2004.)*

Unha das finalidades esenciais dos sistemas públicos de pensións é a de proporcionarles aos pensionistas rendas que substitúan os ingresos deixados de percibir ao producirse a continxencia producida ou que compensen as carencias de ingresos ante as situacións de necesidade. Nunha ou outra modalidade, contributiva e non contributiva, da protección social, é indispensable a actualización periódica das pensións.

En España a revalorización anual das pensións produciuse sen interrupción desde hai máis de 15 anos, e o propio Congreso dos Deputados, dentro do denominado «Pacto de Toledo», aprobou unha recomendación, a undécima, sobre «Mantemento do poder adquisitivo das pensións» que garantía a aplicación deste criterio mediante a revalorización automática das pensións en función da evolución do índice de prezos de consumo (IPC).

En desenvolvemento de tal compromiso político, o artigo 48 do texto refundido da Lei xeral da Seguridade Social, aprobado polo Real decreto legislativo 1/1994, do 20 de xuño, en redacción dada pola Lei 24/1997, do 15 de xullo, como o artigo 27 do texto refundido da Lei de clases pasivas do Estado, prevén que as pensións serán revalorizadas ao comezo de cada ano en función do IPC previsto, e concretan que se o IPC acumulado correspondente ao período comprendido entre novembro do exercicio anterior

e novembro do exercicio económico fose superior ao previsto para o exercicio, procederáse á correspondente actualización de acordo co que estableza a respectiva Lei de orzamentos xerais do Estado, e que se lles aboará, así mesmo, aos pensionistas cuxas pensións fosen obxecto de revalorización no exercicio anterior a diferenza nunha paga única antes do 1 de abril do exercicio posterior.

A Lei de orzamentos xerais do Estado para o ano 2005 establece as previsións de revalorización para o dito exercicio en función do IPC previsto e a paga única por desviación da inflación real de 2004 sobre a inicialmente considerada. Non obstante, como consecuencia do veto aprobado polo Senado en sesión plenaria o pasado 13 decembro, a Lei de orzamentos xerais do Estado non puido recoller a evolución do IPC entre novembro de 2003 e novembro de 2004, coñecida o 15 de decembro, e que en exercicios anteriores se incorporou ao proxecto de Lei no seu trámite parlamentario de discusión de emendas parciais polo Pleno do Senado.

Esta circunstancia orixinaríalles un grave quebranto aos pensionistas españois, absolutamente contradictorio co compromiso do Goberno de España de manter o poder adquisitivo das pensións e de elevar paulatinamente as contías das pensións máis baixas, que tería incidencia nos seguintes contidos dos orzamentos xerais do Estado para o ano 2005: haberes reguladores das pensións do réxime de clases pasivas do Estado; importes das pensións da lexislación especial derivada da guerra civil; contías máis reducidas no sinalamento inicial e na revalorización de pensións; límites máis escasos de ingresos para acceder aos complementos por mínimos e ás prestacións da Seguridade Social por fillo a cargo; contías das pensións mínimas, non contributivas, das non concorrentes do extinguido seguro obrigatorio de vellez e invalidez e determinados subsidios e axudas sociais.

Faise pois imprescindible que, con carácter urxente, se adopten as medidas necesarias para garantirles aos pensionistas de clases pasivas e da Seguridade Social, tanto nas súas modalidades contributivas como non contributivas, e aos perceptores doutras pensións e demais prestacións públicas o mantemento íntegro do poder adquisitivo das súas pensións ou demais prestacións, de modo que as porcentaxes de revalorización previstas para 2005 se apliquen sobre as contías de 2004, unha vez actualizadas conforme a desviación do IPC producida entre novembro de 2003 e novembro de 2004 respecto do inicialmente previsto para este último exercicio.

Na súa virtude, en uso da autorización contida no artigo 86 da Constitución española, por proposta dos ministros de Economía e Facenda e de Traballo e Asuntos Sociais e logo de deliberación do Consello de Ministros na súa reunión do día 23 decembro de 2004,

DISPÓN O :

Artigo único. *Modificación da Lei de orzamentos xerais do Estado para o ano 2005.*

A Lei de orzamentos xerais do Estado para o ano 2005 modifícase nos seguintes termos:

Un. Modifícase o título IV, que pasa a ter a redacción seguinte:

«TÍTULO IV

Das pensións públicas

CAPÍTULO I

Determinación inicial das pensións do réxime de clases pasivas do Estado, especiais de guerra e non contributivas da Seguridade Social

Artigo 36. *Determinación inicial das pensións do réxime de clases pasivas do Estado.*

Un. Para a determinación inicial das pensións reguladas nos capítulos II, III, IV e VII do subtítulo segundo do título primeiro do texto refundido da Lei de clases pasivas do Estado, aprobado polo Real decreto lexislativo 670/1987, do 30 de abril, causadas polo persoal a que se refire o artigo 3.1.a), b) e e) do mesmo texto legal, teranse en conta para o ano 2005 os haberes reguladores que a continuación se establecen, asignándose de acordo coas regras que se conteñen en cada un dos respectivos puntos do artigo 30 da citada norma:

a) Para o persoal incluído nos supostos do punto 2 do artigo 30 do texto refundido da Lei de clases pasivas do Estado:

Grupo	Haber regulador euros/ano
A	33.943,22
B	26.714,17
C	20.516,95
D	16.232,31
E	13.839,32

b) Para o persoal mencionado no punto 3 do referido artigo 30 do texto refundido da Lei de clases pasivas do Estado:

Administración civil e militar do Estado

Índice	Haber regulador euros/ano
10	33.943,22
8	26.714,17
6	20.516,95
4	16.232,31
3	13.839,32

Administración de xustiza

Multiplicador	Haber regulador euros/ano
4,75	33.943,22
4,50	33.943,22
4,00	33.943,22
3,50	33.943,22
3,25	33.943,22
3,00	33.943,22
2,50	33.943,22

Multiplicador	Haber regulador euros/ano
2,25	26.714,17
2,00	23.392,60
1,50	16.232,31
1,25	13.839,32

Tribunal Constitucional

Corpo	Haber regulador euros/ano
Secretario xeral	33.943,22
De letrados	33.943,22
Xerente	33.943,22

Cortes Xerais

Corpo	Haber regulador euros/ano
De letrados	33.943,22
De arquivistas-bibliotecarios ..	33.943,22
De asesores facultativos	33.943,22
De redactores, taquígrafos e este-notipistas	33.943,22
Técnico-administrativo	33.943,22
Auxiliar administrativo	20.516,95
De conserxes	16.232,31

Dous. Para a determinación inicial das pensións causadas polo persoal a que se refire o artigo 3.2.a) e c), do texto refundido da Lei de clases pasivas do Estado, que produzan efectos económicos a partir do 1 de xaneiro do 2005, teranse en conta as bases reguladoras que resulten da aplicación das seguintes regras:

a) Tomarase o importe que, dentro dos cadros que se recollen a continuación, corresponda ao causante polos conceptos de soldo e, se é o caso, grao, en cómputo anual, en función do corpo ou do índice de proporcionalidade e grao de carreira administrativa ou do índice multiplicador que tivese asignado o 31 de decembro de 1984 o corpo, carreira, escala, praza, emprego ou categoría a que pertencese aquel.

Índice	Grao	Grao especial	Importe por concepto de soldo e grao en cómputo anual - Euros
10 (5,5)	8		22.754,70
10 (5,5)	7		22.129,33
10 (5,5)	6		21.503,98
10 (5,5)	3		19.627,86
10	5		19.308,54
10	4		18.683,19
10	3		18.057,84
10	2		17.432,43
10	1		16.807,06
8	6		16.236,98
8	5		15.736,77
8	4		15.236,56

Índice	Grao	Grao especial	Importe por concepto de soldo e grao en cómputo anual - Euros
8	3		14.736,34
8	2		14.236,14
8	1		13.735,91
6	5		12.369,60
6	4		11.994,56
6	3		11.619,55
6	2		11.244,48
6	1	(12 por 100)	12.128,79
6	1		10.869,43
4	3		9.152,90
4	2	(24 por 100)	10.921,67
4	2		8.902,80
4	1	(12 por 100)	9.663,05
4	1		8.652,71
3	3		7.902,90
3	2		7.715,35
3	1		7.527,84

Administración de xustiza

Multiplicador	Importe por concepto de soldo en cómputo anual - Euros
4,75	37.159,07
4,50	35.203,32
4,00	31.291,85
3,50	27.380,35
3,25	25.424,62
3,00	23.468,86
2,50	19.557,40
2,25	17.601,66
2,00	15.645,91
1,50	11.734,44
1,25	9.778,69

Tribunal Constitucional

Corpo	Importe por concepto de soldo en cómputo anual - Euros
Secretario xeral	35.203,32
De letrados	31.291,85
Xerente	31.291,85

Cortes Xerais

Corpo	Importe por concepto de soldo en cómputo anual - Euros
De letrados	20.478,57
De arquivistas-bibliotecarios ...	20.478,57
De asesores facultativos	20.478,57

Corpo	Importe por concepto de soldo en cómputo anual - Euros
De redactores, taquígrafos e estenotipistas	18.805,77
Técnico-administrativo	18.805,77
Auxiliar administrativo	11.325,51
De conserxes	8.958,60

b) Ao importe anual polos conceptos de soldo e, se é o caso, grao, a que se refire o punto anterior, sumaráselle a contía que se obteña de multiplicar o número de trienios que teña acreditados o causante polo valor unitario en cómputo anual que corresponda a cada trienio en función do corpo ou praza en que prestase servizos o causante, atendendo, se é o caso, aos índices de proporcionalidade ou multiplicadores asignados a aqueles nos cadros seguintes:

Administración civil e militar do Estado

Índice	Valor unitario do trienio en cómputo anual - Euros
10	735,09
8	588,08
6	441,04
4	294,06
3	220,53

Administración de xustiza

Multiplicadores para efectos de trienios	Valor unitario do trienio en cómputo anual - Euros
3,50	1.369,00
3,25	1.271,24
3,00	1.173,45
2,50	977,85
2,25	881,28
2,00	782,30
1,50	586,71
1,25	488,94

Tribunal Constitucional

Corpo	Valor unitario do trienio en cómputo anual - Euros
Secretario xeral	1.369,00
De letrados	1.369,00
Xerente	1.369,00

Cortes Xerais

Corpo	Valor unitario do trienio en cómputo anual - Euros
De letrados	837,32
De arquivistas-bibliotecarios ...	837,32
De asesores facultativos	837,32
De redactores, taquígrafos e estenotipistas	837,32
Técnico-administrativo	837,32
Auxiliar administrativo	502,41
De conserxes	334,93

Tres. O importe mensual das pensións a que se refire este precepto obterase dividindo por 14 o anual calculado segundo o disposto nas regras precedentes e na lexislación correspondente.

Artigo 37. *Determinación inicial e contía das pensións especiais de guerra para o ano 2005.*

Un. O importe das pensións recoñecidas ao amparo da Lei 5/1979, do 18 de setembro, en favor de familiares de falecidos como consecuencia da guerra civil non poderá ser inferior, para o 2005, ao establecido como contía mínima no sistema da Seguridade Social para as pensións de viuvez en favor de titulares maiores de 65 anos.

O disposto no parágrafo anterior non será de aplicación ás pensións causadas polo persoal non funcionario en favor de orfos non incapacitados con dereito a pensión, de acordo coa súa lexislación reguladora, cuxa contía será de 56,86 euros mensuais.

Dous. 1. As pensións recoñecidas ao amparo da Lei 35/1980, do 26 de xuño, de mutilados de guerra ex combatentes da zona republicana, cuxos causantes non tivesen a condición de militar profesional das forzas e institutos armados, fíxanse para o 2005 nas seguintes contías:

a) A pensión de mutilación será a que resulte de aplicar as porcentaxes establecidas para cada grao de incapacidade á cantidade de 4.194,32 euros, referida a 12 mensualidades.

b) A suma da remuneración básica, a remuneración substitutoria de trienios e as remuneracións suplementarias en compensación por retribucións non percibidas será de 11.311,99 euros, referida a 12 mensualidades, sendo o importe de cada unha das dúas mensualidades extraordinarias da mesma contía que a da mensualidade ordinaria por estes conceptos.

c) As pensións en favor de familiares fíxanse no mesmo importe que o establecido como de contía mínima no sistema da Seguridade Social para as pensións de viuvez en favor de titulares maiores de 65 anos, agás as pensións en favor de orfos non incapacitados maiores de 21 anos con dereito a pensión, de acordo coa súa lexislación reguladora, cuxa contía será de 43,27 euros mensuais.

Dous. 2. O importe das pensións en favor de familiares de ex combatentes profesionais recoñecidas ao amparo da Lei 35/1980, do 26 de xuño, non poderá ser inferior, para o 2005, ao establecido como de contía mínima no sistema da Seguridade Social para as pensións de viuvez en favor de titulares maiores de 65 anos.

Tres. As pensións recoñecidas ao amparo da Lei 6/1982, do 29 de marzo, sobre retribución básica

a mutilados civís de guerra, fíxanse para o 2005 as seguintes contías:

a) A retribución básica para os que teñan recoñecida unha incapacidade de segundo, terceiro ou cuarto grao, no 100 por cento da cantidade de 7.918,40 euros, referida a 12 mensualidades.

b) As pensións en favor de familiares no mesmo importe que o establecido como de contía mínima no sistema da Seguridade Social para as pensións de viuvez en favor de titulares maiores de 65 anos.

Catro. As pensións recoñecidas ao amparo do Decreto 670/1976, do 5 de marzo, en favor de mutilados de guerra que non puideron integrarse no Corpo de Cabaleiros Mutilados, estableceranse, para o 2005, no importe que resulte de aplicar as porcentaxes establecidas para cada grao de incapacidade á contía de 5.025,33 euros, referida a 12 mensualidades.

Cinco. A contía para o 2005 das pensións causadas ao amparo do título II da Lei 37/1984, do 22 de outubro, sobre recoñecemento de dereitos e servizos prestados aos que durante a guerra civil formaron parte das Forzas Armadas e de Orde Pública e Corpo de Carabineiros da República, fíxase tomando en consideración o importe polos conceptos de soldo e grao que proceda de entre os contidos no punto dous.a) do precedente artigo 36.

As contías destas pensións non poderán ser inferiores ás seguintes:

a) Nas pensións en favor de causantes, ao importe establecido como de contía mínima no sistema da Seguridade Social para as pensións de xubilación, con cónxuxe a cargo, en favor de titulares maiores de 65 anos.

b) Nas pensións de viuvez, ao importe establecido como de contía mínima no sistema da Seguridade Social para as pensións de viuvez en favor de titulares maiores de 65 anos.

Artigo 38. *Determinación inicial das pensións non contributivas da Seguridade Social.*

Para o ano 2005, a contía das pensións de xubilación e invalidez da Seguridade Social, na súa modalidade non contributiva, fíxase en 4.043,06 euros integros anuais.

CAPÍTULO II

Limitacións no sinalamento inicial das pensións públicas

Artigo 39. *Limitación do sinalamento inicial das pensións públicas.*

Un. O importe que se percibirá como consecuencia do sinalamento inicial das pensións públicas non poderá superar durante o ano 2005 a contía íntegra de 2.159,12 euros mensuais, sen prexuízo das pagas extraordinarias que lle puideren corresponder ao seu titular e cuxa contía tamén estará afectada polo citado límite.

Non obstante o anterior, se o pensionista tivese dereito a percibir menos ou máis de 14 pagas ao ano, incluídas as extraordinarias, o dito límite mensual deberá ser adecuado, para efectos de que a contía íntegra anual que corresponda ao interesado alcance ou non supere, durante o ano 2005 o importe de 30.227,68 euros.

Dous. Naqueles supostos en que un mesmo titular cause simultaneamente dereito a dúas ou máis pensións públicas das enumeradas no artigo 37 da Lei 4/1990, do 29 de xuño, de orzamentos xerais

do Estado para 1990, conforme a redacción dada pola disposición adicional décima da Lei 62/2003, do 30 de decembro, de medidas fiscais, administrativas e da orde social, o importe conxunto que se percibirá como consecuencia do sinalamento inicial de todas elas estará suxeito aos mesmos límites que se establecen no punto anterior.

Para tal efecto determinarase, en primeiro lugar, o importe íntegro de cada unha das pensións públicas de que se trate e, se a suma de todas elas excede os 2.159,12 euros mensuais, reduciranse proporcionalmente ata absorber o dito exceso.

Non obstante, se algunha das pensións que se causen estivese a cargo do fondo especial dunha das mutualidades de funcionarios incluídas na alínea c) do artigo 37 da Lei 4/1990, do 29 de xuño, de orzamentos xerais do Estado para 1990, conforme a redacción dada pola disposición adicional décima da Lei 62/2003, do 30 de decembro, a minoración efectuarase preferentemente e, de resultar posible, con simultaneidade ao seu recoñecemento sobre o importe íntegro das ditas pensións, procedéndose con posterioridade, se iso fose necesario, á aplicación da redución proporcional nas restantes pensións, para que a suma de todas elas non supere o indicado límite máximo.

Tres. Cando se efectúe o sinalamento inicial dunha pensión pública en favor de quen xa estivese percibindo outra ou outras pensións públicas, se a suma conxunta do importe íntegro de todas elas superase os límites establecidos no punto un deste precepto, minorarase ou suprimirase o importe íntegro que se vai percibir como consecuencia do último sinalamento ata absorber a contía que exceda do referido límite legal.

Non obstante, se a pensión obxecto de sinalamento inicial, no presente ou en anteriores exercicios económicos, tivese a consideración de renda exenta na lexislación reguladora do imposto sobre a renda das persoas físicas, a solicitude do seu titular, procederá efectuar a citada minoración ou supresión sobre a pensión ou pensións públicas que o interesado causase anteriormente. En tales supostos os efectos da regularización retrotraeranse ao día 1 de xaneiro do ano en que se solicite ou á data inicial de aboamento da nova pensión, se esta fose posterior.

Catro. Se no momento do sinalamento inicial a que se refiren os puntos anteriores os organismos ou entidades competentes non puideren coñecer a contía e natureza das outras pensións que correspondan ao beneficiario, o dito sinalamento realizarase con carácter provisional ata o momento en que se poidan practicar as oportunas comprobacións.

A regularización definitiva dos sinalamentos provisionais levará, se é o caso, aparellada a exixencia do reintegro do indebidamente percibido polo titular da pensión. Este reintegro poderá practicarse con cargo ás sucesivas mensualidades de pensión.

Cinco. Se, con posterioridade á minoración ou supresión do importe do sinalamento inicial a que se refiren os puntos dous e tres, se alterase, por calquera circunstancia, a contía ou composición das outras pensións públicas percibidas polo titular, revisarase de oficio ou por instancia de parte as limitacións que se efectuasen, con efectos do primeiro día do mes seguinte a aquel en que se produxise a variación.

En todo caso, os sinalamentos iniciais realizados en supostos de concorrencia de pensións públicas estarán suxeitos a revisión periódica.

Seis. A minoración ou supresión do importe dos sinalamentos iniciais de pensións públicas que puideren efectuarse por aplicación das normas limi-

tativas non significará, de ningún xeito, mingua ou prexuízo dos dereitos anexos ao recoñecemento da pensión diferentes ao do cobramento desta.

Sete. O límite máximo de percepción establecido neste artigo non se aplicará ás seguintes pensións públicas que se causen durante o ano 2005:

- a) Pensións extraordinarias do réxime de clases pasivas do Estado, orixinadas por actos terroristas.
- b) Pensións do réxime de clases pasivas do Estado melloradas ao amparo do Real decreto lei 19/1981, do 30 de outubro, sobre pensións extraordinarias a vítimas do terrorismo.
- c) Pensións extraordinarias recoñecidas pola Seguridade Social, orixinadas por actos terroristas.
- d) Pensións extraordinarias recoñecidas ao amparo da disposición adicional cuadraxésimo terceira da Lei 62/2003, do 30 de decembro, de medidas fiscais, administrativas e da orde social.

Oito. Cando no momento do sinalamento inicial das pensións públicas concorran nun mesmo titular algunha ou algunhas das pensións mencionadas no punto sete deste artigo ou das establecidas no título II do Real decreto 851/1992, do 10 de xullo, polo que se regulan determinadas pensións extraordinarias causadas por actos de terrorismo, con outra ou outras pensións públicas, as normas limitativas deste artigo só se aplicarán respecto das non procedentes de actos terroristas.

CAPÍTULO III

Revalorización e modificación dos valores das pensións públicas para o ano 2005

Artigo 40. *Revalorización e modificación dos valores das pensións públicas para o 2005.*

Un. As pensións de clases pasivas do Estado, salvo as excepcións que se conteñen nos seguintes artigos deste capítulo e que lles sexan de aplicación, experimentarán no 2005 un incremento do dous por cento, de conformidade co previsto no artigo 27 do texto refundido da Lei de clases pasivas do Estado. O anterior enténdese sen prexuízo dos importes de garantía que figuran no precedente artigo 37, respecto das pensións recoñecidas ao amparo da legislación especial da guerra civil.

Dous. As pensións aboadas polo sistema da Seguridade Social, na súa modalidade contributiva, experimentarán no ano 2005 un incremento do dous por cento, de conformidade co previsto no artigo 48 do texto refundido da Lei xeral da Seguridade Social, sen prexuízo das excepcións contidas nos artigos seguintes deste capítulo e que lles sexan expresamente de aplicación.

Tres. As pensións referidas no artigo 38 deste título que viñesen percibíndose en 31 de decembro de 2004 fixaranse no ano 2005 en 4.043,06 euros íntegros anuais.

Catro. De acordo co establecido na disposición adicional sexta.un do texto refundido da Lei sobre Seguridade Social dos funcionarios civís do Estado, aprobado polo Real decreto legislativo 4/2000, do 23 de xuño, as pensións das mutualidades integradas no Fondo Especial da Mutualidade Xeral de Funcionarios Civís do Estado, cando fosen causadas con posterioridade ao 31 de decembro de 1999, experimentarán o 1 de xaneiro do ano 2005 unha redución, a respecto dos importes percibidos en 31 de decembro de 2004, do 20 por cento da diferenza entre a contía correspondente a 31 de decembro de 1978 –ou tratándose do Montepío de Funcionarios da Organización Sindical, a 31 de decembro

de 1977– e a que correspondería en 31 de decembro de 1973.

Cinco. As pensións aboadas con cargo aos réximes ou sistemas de previsión enumerados no artigo 37 da Lei 4/1990, do 29 de xuño, de orzamentos xerais do Estado para 1990, conforme a redacción dada pola disposición adicional décima da Lei 62/2003, do 30 de decembro, e non referidas nos puntos anteriores deste artigo, experimentarán en 2005 a revalorización ou modificación que, se é o caso, proceda segundo a súa normativa propia, que se aplicará sobre as contías percibidas o 31 de decembro de 2004, salvo as excepcións que se conteñen nos seguintes artigos deste capítulo e que lles sexan expresamente de aplicación.

Artigo 41. *Pensións non revalorizables durante o ano 2005.*

Un. No ano 2005 non experimentarán revalorización as pensións públicas seguintes:

- a) As pensións aboadas con cargo a calquera dos réximes ou sistemas de previsión enumerados no artigo 37 da Lei 4/1990, do 29 de xuño, de orzamentos xerais do Estado para 1990, conforme a redacción dada pola disposición adicional décima da Lei 62/2003, do 30 de decembro, cuxo importe íntegro mensual, sumado, se é o caso, ao importe íntegro mensual das outras pensións públicas percibidas polo seu titular, exceda os 2.159,12 euros íntegros en cómputo mensual, entendéndose esta cantidade nos termos expostos no precedente artigo.

O disposto no parágrafo anterior non será de aplicación ás pensións extraordinarias do réxime de clases pasivas do Estado e da Seguridade Social, orixinadas por actos terroristas, así como ás pensións melloradas ao amparo do Real decreto lei 19/1981, do 30 do outubro, sobre pensións extraordinarias a vítimas do terrorismo, e ás pensións recoñecidas ao amparo da disposición adicional cuadraxésimo terceira da Lei 62/2003, do 30 de decembro, de medidas fiscais, administrativas e da orde social.

- b) As pensións de clases pasivas recoñecidas a favor dos legoeiros do Estado e causadas con anterioridade ao 1 de xaneiro de 1985, con excepción daquelas cuxo titular só percíbese esta pensión como tal legoeiro.

- c) As pensións recoñecidas ao amparo da Lei 5/1979, do 18 de setembro, en favor de orfos non incapacitados, excepto cando os causantes de tales pensións tivesen a condición de funcionarios.

- d) As pensións recoñecidas ao amparo da Lei 35/1980, do 26 de xuño, en favor de orfos maiores de 21 anos non incapacitados, excepto cando os causantes de tales pensións tivesen a condición de ex combatentes profesionais.

- e) As pensións do extinguido seguro obrigatorio de vellez e invalidez, cando entren en concorrencia con outras pensións públicas, excepto co subsidio de axuda por terceira persoa previsto na Lei 13/1982, do 7 de abril, de integración social dos minusválidos.

Non obstante o disposto no parágrafo anterior, cando a suma de todas as pensións concorrentes e as do citado seguro obrigatorio de vellez e invalidez, unha vez revalorizadas aquelas, sexa inferior ás contías fixas sinaladas para tal seguro no artigo 45 desta lei, calculadas unhas e outras en cómputo anual, a pensión do seguro obrigatorio de vellez e invalidez revalorizarase nun importe igual á diferenza resultante. Esta diferenza non ten carácter

consolidable, sendo absorbible con calquera incremento que poidan experimentar as percepcións do interesado, xa sexa en concepto de revalorizacións ou por recoñecemento de novas prestacións de carácter periódico.

f) As pensións das mutualidades integradas no Fondo Especial da Mutualidade Xeral de Funcionarios Cívís do Estado que, en 31 de decembro de 2004, alcanzasen xa as contías correspondentes ao 31 de decembro de 1973.

Dous. No caso de que mutualidades, montepíos ou entidades de previsión social de calquera tipo que integren persoal pertencente a empresas ou sociedades con participación maioritaria do Estado, de comunidades autónomas, de corporacións locais ou de organismos autónomos e se financien con fondos procedentes dos ditos órganos ou entidades públicas, ou no caso de que estes, directamente, estean aboando ao persoal incluído na acción protectora daquelas pensións complementarias por calquera concepto sobre as que lles correspondería aboar aos réximes xerais que sexan de aplicación, as revalorizacións a que se refire o artigo 40 serán consideradas como límite máximo, podendo aplicarse coeficientes menores e incluso inferiores que a unidade, ás ditas pensións complementarias, de acordo coas súas regulacións propias ou cos pactos que se produzan.

Artigo 42. Limitación do importe da revalorización para o ano 2005 das pensións públicas.

Un. O importe da revalorización para o ano 2005 das pensións públicas que, conforme as normas dos preceptos deste capítulo, poidan incrementarse non poderá supor para estas, unha vez revalorizadas, un valor íntegro anual superior a 30.227,68 euros.

Dous. Naqueles supostos en que un mesmo titular perciba dúas ou máis pensións públicas, a suma do importe anual íntegro de todas elas, unha vez revalorizadas as que procedan, non poderá superar o límite máximo a que se refire o punto anterior. Se o superase, minorarase proporcionalmente a contía da revalorización, ata absorber o exceso sobre o dito límite.

Para tal efecto, cada entidade ou organismo competente para revalorizar determinará o seu propio límite máximo de percepción anual para as pensións ao seu cargo. Este límite consistirá nunha cifra que garde coa citada contía íntegra de 30.227,68 euros anuais a mesma proporción que a que garda a pensión ou pensións a cargo do organismo ou entidade de que se trate co conxunto total das pensións públicas que perciba o titular.

O referido límite (L) obterase mediante a aplicación da seguinte fórmula:

$$L = \frac{P}{T} \times 30.227,68 \text{ euros anuais}$$

sendo «P» o valor íntegro teórico anual alcanzado o 31 de decembro de 2004 pola pensión ou pensións a cargo do organismo ou entidade competente, e «T», o resultado de engadir á cifra anterior o valor íntegro anual das restantes pensións concorrentes do mesmo titular en idéntico momento.

Non obstante o anterior, se algunha das pensións que percíbese o interesado estivese a cargo do fondo especial dunha das mutualidades de funcionarios incluídas na alínea c) do artigo 37 da Lei 4/1990, do 29 de xuño, de orzamentos xerais do Estado para 1990, conforme a redacción dada pola disposición adicional décima da Lei 62/2003, do 30 de decembro, ou se tratase das pensións non revalorizables a cargo dalgunha das entidades a que se

refire o punto dous do artigo 41 a aplicación das regras recollidas nos parágrafos anteriores adaptárase regulamentariamente co fin de que se poida acadar, se é o caso, o límite máximo de percepción, no suposto de concorreren as ditas pensións complementarias con outra ou outras cuxo importe fose minorado ou suprimido para efectos de non superar a contía máxima fixada en cada momento.

Tres. Cando o organismo ou entidade competente para efectuar a revalorización da pensión pública, no momento de a practicar, non puidese comprobar fidedignamente a realidade da contía das outras pensións públicas que perciba o titular, a dita revalorización efectuarase con carácter provisional ata o momento en que se poidan practicar as oportunas comprobacións.

A regularización definitiva levará aparellada, se é o caso, a exigencia do reintegro do indebidamente percibido polo titular. Este reintegro poderá practicarse con cargo ás sucesivas mensualidades de pensión.

En todo caso, as revalorizacións efectuadas en supostos de concurrencia de pensións públicas estarán suxeitas a revisión ou inspección periódica.

Catro. As normas limitativas reguladas neste precepto non se aplicarán a:

a) Pensións extraordinarias do réxime de clases pasivas do Estado, orixinadas por actos terroristas.

b) Pensións do réxime de clases pasivas do Estado melloradas ao amparo do Real decreto lei 19/1981, do 30 de outubro, sobre pensións extraordinarias a vítimas do terrorismo.

c) Pensións extraordinarias recoñecidas pola Seguridade Social, orixinadas por actos terroristas.

d) Pensións extraordinarias recoñecidas ao amparo da disposición adicional cuaxadésimo terceira da Lei 62/2003, do 30 de decembro, de medidas fiscais, administrativas e da orde social.

Cinco. Cando nun mesmo titular conorra algunha ou algunhas das pensións mencionadas no precedente punto tres ou das establecidas no título II do Real decreto 851/1992, do 10 de xullo, polo que se regulan determinadas pensións extraordinarias causadas por actos terroristas, con outra ou outras pensións públicas, as normas limitativas deste precepto só se aplicarán respecto das non procedentes de actos terroristas.

CAPÍTULO IV

Complementos para mínimos

Artigo 43. Recoñecemento de complementos para mínimos nas pensións de clases pasivas.

Un. Nos termos que regulamentariamente se determinen, terán dereito a percibir os complementos económicos necesarios para alcanzar a contía mínima das pensións os pensionistas de clases pasivas do Estado que non perciban durante o exercicio do 2005 ingresos de traballo ou de capital ou que, percibíndolos, non superen os 6.122,53 euros ao ano.

Para tal efecto, tamén se computarán entre tales ingresos as plusvalías ou ganancias patrimoniais, así como os rendementos que poidan deducirse do montante económico do patrimonio, aplicándolle ao seu valor o 50 por cento do tipo de xuro legal do diñeiro establecido nesta lei, coa excepción da vivenda habitualmente ocupada polo pensionista e dos bens cuxas rendas fosen computadas.

Para acreditar as rendas e ingresos, o centro rector poderá exixir do pensionista unha declaración

daqueles e, se é o caso, a achega das declaracións tributarias presentadas.

Presumirase que concorren os requisitos indicados cando o interesado percíbese durante 2004 ingresos por contía igual ou inferior a 5.915,49 euros anuais. Esta presunción poderase destruír, se é o caso, polas probas obtidas pola Administración.

Para os únicos efectos de garantía de complementos para mínimos, equipararanse a ingresos de traballo as pensións públicas que non estean a cargo de calquera dos réximes públicos básicos de previsión social.

Nos supostos en que, de conformidade coas previsións legais, se teña recoñecida unha parte proporcional da pensión de viuvez, o complemento para mínimos que se aplicará, se é o caso, serao na mesma proporción que se tivo en conta para o recoñecemento da pensión.

Os efectos económicos do recoñecemento dos complementos económicos retrotraeranse ao día 1 de xaneiro do ano en que se soliciten ou á data de arranque da pensión, se esta fose posterior ao 1 de xaneiro.

Non obstante, se a solicitude de tal recoñecemento se efectuase con ocasión de exercer o dereito ao cobramento da pensión, os efectos económicos poderán ser os da data de arranque daquela, cunha retroactividade máxima dun ano desde que se soliciten e sempre que se reúnan os requisitos necesarios para a súa percepción.

Dous. Os recoñecementos de complementos económicos que se efectúen no 2005 con base en declaracións do interesado terán carácter provisional ata que se comprobe a realidade ou efectividade do declarado.

En todo caso, a Administración poderá revisar periodicamente, de oficio ou por instancia do interesado, as resolucións de recoñecemento de complementos económicos, podendo levar aparellado, se é o caso, a exixencia do reintegro do indebidamente percibido polo titular da pensión. Este reintegro poderá practicarse con cargo ás sucesivas mensualidades de pensión.

Tres. Durante 2005 as contías mínimas das pensións de clases pasivas quedan fixadas, en cómputo anual, nos importes seguintes:

Complementos para mínimos

Clase de pensión	Importe	
	Con cónxuxe a cargo	Sen cónxuxe a cargo
Pensión de xubilación ou retiro.	524,01 euros/mes 7.336,14 euros/ano	438,71 euros/mes 6.141,94 euros/ano
Pensión de viuvez.	438,71 euros/mes 6.141,94 euros/ano	
Pensión familiar distinta de viuvez, sendo N o número de beneficiarios da pensión ou pensións.	438,71 euros/mes N 6.141,94 euros/ano N	

Catro. Os complementos económicos regulados nos puntos precedentes non se aplicarán ás pensións recoñecidas ao amparo da lexislación especial derivada da guerra civil cuxas contías se fixan no artigo 37 desta lei, excepto ás pensións de orfandade recoñecidas ao amparo do título II da Lei 37/1984, do 22 de outubro, ás que si lles serán de aplicación os referidos complementos económicos.

Artigo 44. Recoñecemento dos complementos para as pensións inferiores á mínima no sistema da Seguridade Social e importes das ditas pensións no ano 2005.

Un. Nos termos que regulamentariamente se determinen, terán dereito a percibir os complementos necesarios para acadar a contía mínima de pensións os pensionistas do sistema da Seguridade Social na súa modalidade contributiva que non perciban ingresos de capital ou traballo persoal ou que, percibíndoos, non excedan os 6.122,53 euros ao ano. Para tal efecto, tamén se computarán entre tales ingresos as plusvalías ou ganancias patrimoniais, así como os rendementos que se poidan deducir do montante económico do patrimonio, aplicando ao seu valor o 50 por cento do tipo de xuro legal do diñeiro establecido nesta lei, coa excepción da vivenda habitualmente ocupada polo pensionista e dos bens cuxas rendas fosen computadas.

Para acreditar as rendas e ingresos, a entidade xestora poderalle exixir ao pensionista unha declaración daqueles e, se é o caso, a achega das declaracións tributarias presentadas.

Non obstante, os pensionistas da Seguridade Social na súa modalidade contributiva que perciban ingresos polos conceptos indicados en contía superior á cifra sinalada no parágrafo primeiro deste punto terán dereito a un complemento por mínimos cando a suma en cómputo anual de tales ingresos e dos correspondentes á pensión xa revalorizada resulte inferior á suma de 6.122,53 euros máis o importe en cómputo anual da contía mínima fixada para a clase de pensión de que se trate. Neste caso, o complemento para mínimos consistirá na diferenza entre os importes de ambas as sumas, sempre que esta diferenza non determine para o interesado unha percepción mensual conxunta de pensión e complemento por importe superior ao da contía mínima de pensión que corresponda en termos mensuais.

Para os únicos efectos de garantía de complementos para mínimos, equipararanse a ingresos de traballo as pensións públicas que non estean a cargo de calquera dos réximes públicos básicos de previsión social.

Dous. Presumirase que concorren os requisitos indicados no punto anterior cando o interesado percíbese durante o ano 2004 ingresos por contía igual ou inferior a 5.915,49 euros. Esta presunción poderá destruírse, se é o caso, polas probas obtidas pola Administración.

Tres. Para efectos do previsto neste artigo, considerárase que existe cónxuxe a cargo do titular dunha pensión cando aquel se atope convivindo co pensionista e dependa economicamente del.

Entenderase que existe dependencia económica cando concorran as circunstancias seguintes:

a) Que o cónxuxe do pensionista non sexa, pola súa vez, titular dunha pensión a cargo dun réxime básico público de previsión social, entendendo comprendidos no dito concepto os subsidios de garantía de ingresos mínimos e de axuda por terceira persoa, ambos da Lei 13/1982, do 7 de abril, de integración social de minusválidos, e as pensións asistenciais reguladas na Lei 45/1960, do 21 de xullo.

b) Que os rendementos por calquera natureza do pensionista e do seu cónxuxe, computados na forma sinalada no punto dous do artigo anterior, resulten inferiores a 7.142,00 euros anuais.

Cando a suma, en cómputo anual, dos rendementos referidos no parágrafo anterior e do importe, tamén en cómputo anual, da pensión que se vaia complementar resulte inferior á suma de 7.142,00

euros e da contía anual da pensión mínima con cónxuxe a cargo de que se trate, recoñecerase un complemento igual á diferenza, distribuído entre o número de mensualidades que corresponda.

Catro. Para os efectos previstos no punto un deste artigo, os pensionistas da Seguridade Social na súa modalidade contributiva que teñan recoñecido complemento por mínimos e percibisen durante o ano 2004 ingresos de capital ou traballo persoal que excedan os 5.915,49 euros estarán obrigados a presentar antes do 1 de marzo do ano 2005 declaración expresiva da contía dos ditos ingresos. O incumprimento desta obriga dará lugar ao reintegro das cantidades indebidamente percibidas polo pensionista cos efectos e na forma que regulamentariamente se determinen.

Cinco. Durante o ano 2005, as contías mínimas das pensións do sistema da Seguridade Social, na súa modalidade contributiva, quedan fixadas, en cómputo anual, clase de pensión e requisitos concorrentes no titular, nas contías seguintes:

Clase de pensión	Titulares	
	Con cónxuxe a cargo - Euros/ano	Sen cónxuxe a cargo - Euros/ano
<i>Xubilación</i>		
Titular con sesenta e cinco anos	7.336,14	6.141,94
Titular menor de sesenta e cinco anos	6.856,08	5.722,92
<i>Incapacidade permanente</i>		
Grande invalidez con incremento do 50 por 100	11.004,28	9.212,98
Absoluta	7.336,14	6.141,94
Total: Titular con sesenta e cinco anos	7.336,14	6.141,94
Total: "Cualificada" con idade entre sesenta e sesenta e catro anos	6.856,08	5.722,92
Parcial do réxime de accidentes de traballo:		
Titular con sesenta e cinco anos	7.336,14	6.141,94
<i>Viuvez</i>		
Titular con sesenta e cinco anos		6.141,94
Titular con idade entre sesenta e sesenta e catro anos		5.722,92
Titular con menos de sesenta anos		4.566,80
Titular con menos de sesenta anos e cargas familiares		5.722,92
<i>Orfandade</i>		
Por beneficiario		1.856,68
Na orfandade absoluta o mínimo incrementarase en 4.566,80 euros/ano distribuídos, se é o caso, entre os beneficiarios.		

Clase de pensión	Titulares	
	Con cónxuxe a cargo - Euros/ano	Sen cónxuxe a cargo - Euros/ano
<i>En favor de familiares</i>		
Por beneficiario Se non existe viúvo nin orfo pensionista:		1.856,68
Un só beneficiario, con sesenta e cinco anos		4.779,88
Un só beneficiario, menor de sesenta e cinco anos		4.500,44
Varios beneficiarios: o mínimo asignado a cada un incrementarase no importe que resulte de ratear 2.710,12 euros/ano entre o número de beneficiarios.		

CAPÍTULO V

Outras disposicións en materia de pensións públicas

Artigo 45. *Pensións non concorrentes do extinguido seguro obrigatorio de vellez e invalidez.*

A partir do 1 de xaneiro do ano 2005, a contía das pensións do extinguido seguro obrigatorio de vellez e invalidez, non concorrentes con outras pensións públicas, queda fixada, en cómputo anual, en 4.384,94 euros.

Para os ditos efectos, non se considerará pensión concorrente a percibida polos mutilados útiles ou incapacitados de primeiro grao por causa da pasada guerra civil española, calquera que fose a lexislación reguladora, nin o subsidio de axuda por terceira persoa previsto na Lei 13/1982, do 7 de abril, de integración social dos minusválidos, nin as pensións extraordinarias derivadas de actos de terrorismo.»

Dous. Modifícase a disposición adicional segunda, que pasa a ter a seguinte redacción:

«Disposición adicional segunda. *Prestacións económicas da Seguridade Social por fillo a cargo.*

Un. O límite de ingresos a que se refire o primeiro parágrafo do artigo 182.1.c) do texto refundido da Lei xeral da Seguridade Social, queda fixado, a partir do 1 de xaneiro do ano 2005, en 8.793,03 euros anuais.

O límite de ingresos a que se refire o segundo parágrafo do artigo 182.1.c) do citado texto refundido queda fixado, a partir de 1 de xaneiro de 2005, en 14.990,94 euros anuais, incrementándose en 2.428,11 euros por cada fillo a cargo a partir do cuarto, este incluído.

Dous. A partir do 1 de xaneiro do ano 2005, a contía das prestacións económicas da Seguridade Social por fillo a cargo, con 18 ou máis anos de idade e un grao de minusvalidez igual ou superior ao 65 por cento, será de 3.427,68 euros anuais.

Cando o fillo a cargo teña unha idade de 18 ou máis anos, estea afectado dunha minusvalidez nun grao igual ou superior ao 75 por cento e necesite o concurso doutra persoa para a realización dos actos

esenciais da vida, a contía da prestación económica será de 5.141,52 euros anuais.»

Tres. Modifícase a disposición adicional terceira, que pasa a ter a seguinte redacción:

«Disposición adicional terceira. *Subsidios económicos da Lei 13/1982, do 7 de abril, de integración social dos minusválidos, e pensións asistenciais.*

Un. A partir do 1 de xaneiro do ano 2005, os subsidios económicos a que se refire a Lei 13/1982, do 7 de abril, de integración social dos minusválidos, fixaranse, segundo a clase de subsidio, nas seguintes contías:

	Euros/mes
Subsidio de garantía de ingresos mínimos	149,86
Subsidio por axuda de terceira persoa . .	58,45
Subsidio de mobilidade e compensación para gastos de transporte	45,77

Dous. A partir do 1 de xaneiro do ano 2005, as pensións asistenciais recoñecidas en virtude do disposto na Lei do 21 de xullo de 1960 e no Real decreto 2620/1981, do 24 de xullo, fixaranse na contía de 149,86 euros íntegros mensuais, aboándose dúas pagas extraordinarias do mesmo importe que se devengarán nos meses de xuño e decembro.

As pensións asistenciais serán obxecto de revisión periódica, co fin de comprobar que os beneficiarios manteñen os requisitos exixidos para o seu recoñecemento e, en caso contrario, declarar a extinción do dereito e exixir o reintegro das cantidades indebidamente percibidas. O Ministerio de Traballo e Asuntos Sociais poderá instar a incoación dos procedementos de revisión para efectos de practicar o axuste económico e orzamentario do gasto xerado. Os resultados que ofrezan aqueles procedementos serán comunicados ao citado departamento ministerial.»

Catro. Modifícase a disposición adicional cuarta, que pasa a ter a seguinte redacción:

«Disposición adicional cuarta. *Axudas sociais aos afectados polo virus de inmunodeficiencia humana (VIH).*

Durante o ano 2005, as contías mensuais das axudas sociais recoñecidas en favor das persoas contaminadas polo virus de inmunodeficiencia humana (VIH), establecidas nas alíneas b), c) e d) do punto 1 do artigo 2 do Real decreto lei 9/1993, do 28 de maio, determinaranse mediante a aplicación das proporcións reguladas nos parágrafos citados sobre o importe de 514,45 euros.»

Disposición adicional única. *Coefficiente aplicable para o mantemento do poder adquisitivo das pensións de clases pasivas.*

Para os efectos de garantir o mantemento do poder adquisitivo das pensións de clases pasivas, e con carácter previo a aplicar a revalorización prevista na Lei de orzamentos xerais do Estado para o ano 2005, a contía correspondente ás pensións o 31 de decembro de 2004 deberá

actualizarse, cando proceda, mediante a aplicación a estas do coeficiente 1,0147059.

Así mesmo, de acordo co previsto na disposición adicional quincuaxésimo primeira da Lei de orzamentos xerais do Estado para o ano 2005, os pensionistas de clases pasivas que percibisen durante o ano 2004 pensións obxecto de revalorización, así como aqueles que percibisen a contía correspondente ás pensións mínimas e ao límite máximo de percepción das pensións públicas, e as axudas sociais do Real decreto lei 9/1993, do 28 de maio, ou os seus herdeiros, recibirán nun único pagamento a cantidade equivalente á que resulte de aplicar á pensión ou axuda percibida durante o ano 2004 o coeficiente 0,0147059.

Disposición transitoria única. *Vixencia transitoria de disposicións regulamentarias.*

Ata que non sexa aprobada a correspondente norma regulamentaria de desenvolvemento do previsto neste real decreto lei, no ámbito do réxime de clases pasivas do Estado, continuarán sendo de aplicación, no que non se opoña a aquel, o Real decreto 48/2004, do 19 de xaneiro, sobre revalorización e complementos de pensións de clases pasivas para o ano 2004.

Disposición derradeira primeira. *Determinación do indicador público de renda de efectos múltiples (IPREM) para 2005.*

Con efectos do 1 de xaneiro de 2005, modifícase a disposición adicional décimo sexta da Lei de orzamentos xerais do Estado para o ano 2005, que pasa a ter a seguinte redacción:

«Disposición adicional décimo sexta. *Determinación do indicador público de renda de efectos múltiples (IPREM) para 2005.*

De conformidade co establecido no artigo 2.2 do Real decreto lei 3/2004, do 25 de xuño, para a racionalización da regulación do salario mínimo interprofesional e para o incremento da súa contía, o indicador público de renda de efectos múltiples (IPREM) terá as seguintes contías durante 2005:

- a) O IPREM diario, 15,66 euros.
- b) O IPREM mensual, 469,80 euros.
- c) O IPREM anual, 5.637,60 euros.

Nos supostos en que a referencia ao salario mínimo interprofesional foi substituída pola referencia ao IPREM en aplicación do establecido no Real decreto lei 3/2004, do 25 de xuño, a contía anual do IPREM será de 6.577,20 euros cando as correspondentes normas se refiran ao salario mínimo interprofesional en cómputo anual, salvo que expresamente exclúisen as pagas extraordinarias; neste caso, a contía será de 5.637,60 euros.»

Disposición derradeira segunda. *Pagamento de débedas coa Seguridade Social de institucións sanitarias.*

Modifícase a disposición adicional trixésimo oitava da Lei de orzamentos xerais do Estado para o ano 2005, que pasa a ter a seguinte redacción:

«Disposición adicional trixésimo oitava. *Pagamento de débedas coa Seguridade Social de institucións sanitarias cuxa titularidade teñan as administracións públicas ou institucións sen ánimo de lucro.*

As institucións sanitarias cuxa titularidade teñan as administracións públicas ou institucións públicas ou privadas sen ánimo de lucro, acollidas á

moratoria prevista na disposición adicional trixésima da Lei 41/1994, do 30 de decembro, de orzamentos xerais do Estado para 1995, poderán solicitar da Tesouraría Xeral da Seguridade Social a ampliación da carencia concedida a 11 anos; así mesmo, poderán solicitar a ampliación da moratoria concedida ata un máximo de 10 anos con amortizacións anuais.»

Disposición derradeira terceira. *Disposicións de aplicación e desenvolvemento.*

Autorízase o Goberno para ditar as disposicións que sexan necesarias para a aplicación e desenvolvemento deste real decreto lei.

Disposición derradeira cuarta. *Entrada en vigor.*

Este real decreto lei entrará en vigor o 1 de xaneiro de 2005.

Dado en Madrid o 23 de decembro de 2004.

JUAN CARLOS R.

O presidente do Goberno,
JOSÉ LUIS RODRÍGUEZ ZAPATERO

MINISTERIO DE SANIDADE E CONSUMO

21691 *ORDE SCO/4223/2004, do 16 de decembro, pola que se modifica o anexo da Orde SCO/1052/2002, do 7 de maio, pola que se modifica o anexo do Real decreto 2107/1996, do 20 de setembro, polo que se establecen as normas de identidade e pureza dos colorantes utilizados nos produtos alimenticios. («BOE» 312, do 28-12-2004.)*

Os aditivos colorantes regulados mediante a Directiva 94/36/CE do Parlamento Europeo e do Consello, do 30 de xuño de 1994, e incorporada ao noso dereito interno mediante o Real decreto 2001/1995, do 7 de decembro, polo que se aproba a lista positiva de aditivos colorantes autorizados para o seu uso na elaboración de produtos alimenticios, así como as súas condicións de utilización, teñen establecidos criterios de identidade e pureza.

A determinación dos ditos criterios de pureza realízase mediante a Directiva 95/45/CE da Comisión, do 26 de xullo, pola que se establecen os criterios específicos de pureza dos colorantes utilizados nos produtos alimenticios, incorporada ao noso ordenamento interno mediante o Real decreto 2107/1996, do 20 de setembro, polo que se establecen as normas de identidade e pureza dos colorantes utilizados nos produtos alimenticios.

A publicación da Directiva 99/75/CE da Comisión, do 22 de xullo, pola que se modifica a Directiva 95/45/CE, establece os criterios específicos de pureza de determinados colorantes e a súa incorporación á normativa nacional realízase mediante o Real decreto 1373/2000, do 19 de xullo, polo que se modifica o Real decreto 2107/1996, do 20 de setembro, polo que se establecen as normas de identidade e pureza dos colorantes utilizados nos produtos alimenticios.

A publicación da Directiva 2001/50/CE da Comisión, do 3 de xullo, pola que se modifica a Directiva 99/75/CE, establece novos criterios de pureza para determinados colorantes que se incorporan ao noso dereito interno mediante a Orde SCO/1052/2002, do 7 de maio, pola que se modifica o anexo do Real decreto 2107/1996, do 20 de setembro, polo que se establecen as normas de identidade e pureza dos colorantes utilizados nos produtos alimenticios.

Debido aos avances técnicos, publícase a Directiva 2004/47/CE da Comisión, do 16 de abril, que modifica os criterios de pureza relativos ás substancias E-160 a (i) mestura de carotenos e E-160 a (ii) beta-caroteno.

Esta orde ten por obxecto a incorporación da mencionada Directiva 2004/47/CE da Comisión, do 16 de abril, que modifica os criterios de pureza dos colorantes anteriormente citados.

Para a fixación dos criterios específicos que se establecen na Directiva 2004/47/CE, que se traspón, tivéronse en conta as especificacións e técnicas analíticas que para estes aditivos preparou o Comité Mixto FAO/OMS de Expertos en Aditivos Alimentarios (JECFA). Así mesmo, consultouse o Comité Científico da Alimentación Humana.

Non obstante, calquera aditivo que fose preparado mediante métodos de produción ou con materias primas significativamente diferentes dos incluídos na avaliación do Comité Científico da Alimentación Humana, ou distintos dos mencionados nesta orde, deberase someter ao dito comité para a avaliación da súa seguridade, facendo especial fincapé nos criterios de pureza.

As medidas previstas nesta disposición axústanse ao ditame do Comité Permanente da Cadea Alimentaria e de Sanidade Animal.

Esta orde dítase en uso das facultades atribuídas na disposición derradeira primeira do Real decreto 2107/1996, do 20 de setembro.

Na súa virtude, oídos os sectores afectados e logo do informe preceptivo da Comisión Interministerial para a Ordenación Alimentaria, dispoño:

Artigo único. *Obxecto.*

O anexo da Orde SCO/1052/2002, do 7 de maio, queda modificado nos seguintes termos:

Substitúense no anexo da Orde SCO/1052/2002 os criterios de identidade e pureza dos aditivos colorantes E-160 a (i) mestura de carotenos: «Carotenos de plantas» e «Carotenos de algas», así como o E-160 a (ii) Beta-caroteno: «Beta-caroteno» e «Beta-caroteno de *Blakeslea trispora*», polos contidos no anexo desta orde.

Disposición transitoria única. *Prórroga de fabricación, importación e comercialización.*

1. Ata o 1 de abril de 2005 permítese a fabricación e importación dos produtos a que se refire esta orde que, non axustándose ás súas previsións, cumpran coa normativa vixente antes da súa entrada en vigor.

2. Os produtos postos á venda ou etiquetados antes do 1 de abril de 2005 que non se axusten ao disposto nesta orde poderán seguir comercializándose ata o esgotamento de existencias, sempre que cumpran coa normativa vixente no momento da súa entrada en vigor.

Disposición derradeira única. *Entrada en vigor.*

Esta orde entrará en vigor o día seguinte ao da súa publicación no Boletín Oficial del Estado.

Madrid, 16 de decembro de 2004.

SALGADO MÉNDEZ